

COMISIÓN INFORMATIVA DE COOPERACIÓN, INFRAESTRUTURAS E MEDIO RURAL

ACTA da mencionada comisión informativa, correspondente ao día **11 de decembro de 2019**

Na sala de xuntas do Pazo Provincial da Deputación de Ourense, ás 18.00 horas do día 11 de decembro de 2019, reúnese a comisión informativa de Cooperación, Infraestruturas e Medio Rural coa asistencia dos seguintes deputados e deputadas:

Presidente: D. Pablo Pérez Pérez

Deputados/as do Grupo Popular:

D.^a Ana Patricia Torres Madureira

D. Álvaro José Fernández López

D. Miguel Antonio Cid Álvarez

D.^a Ana María Villarino Pardo

Deputados/as do Grupo Socialista:

D. Álvaro Vila Araújo

D. Aurentino Alonso Araújo

D.^a Elvira Lama Fernández

Deputado de Democracia Ourensana: D. José Miguel Caride Domínguez

Deputado do BNG: D. Bernardo Varela López

Deputada de Ciudadanos-Partido de la Ciudadanía: D.^a Montserrat Lama Nóvoa

Secretario: D. Francisco Cacharro Gosende

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á ORDINARIA DO DÍA 20 DE NOVIEMBRE DE 2019.-

Pola Secretaría Xeral deuse traslado do borrador da acta anterior, correspondente á ordinaria do día 20 de novembro de 2019.

Non se producen intervencións e por unanimidade a comisión adopta o seguinte acordo:

Aprobar a acta da sesión ordinaria da Comisión Informativa de Cooperación, Infraestruturas e Medio Rural do día 20 de novembro, conforme co borrador elaborado pola Secretaría Xeral.

2º.- APROBACIÓN INICIAL DO PLAN PROVINCIAL DE COOPERACIÓN COS CONCELLOS PARA XESTIÓN DELEGADA DO SERVIZO DE INSPECCIÓN DOS TRIBUTOS MUNICIPAIS NO EJERCICIO 2020 E SIGUIENTES.-

O Sr. secretario expón o contido da proposta.

D.^a Montserrat Lama Nóvoa, portavoz de Ciudadanos-Partido de la Ciudadanía, anuncia o seu voto a favor, xa que este plan responde a funcións que debe realizar a Deputación, de asistencia aos concellos.

D. Aurentino Alonso Araújo, do Grupo Socialista, solicita unha aclaración en canto ao custo do plan para os concellos, informándose por parte do Sr. secretario.

Non se producen máis intervencións, e co voto favorable do Grupo Popular (5), de Democracia Ourensana (1) e de Ciudadanos-Partido de la Ciudadanía (1), e a abstención do Grupo Socialista (3) e do BNG (1), a comisión ditamina favorablemente a adopción, por parte do Pleno, do seguinte acordo:

1º) Aprobar inicialmente o Plan provincial de cooperación cos concellos para a xestión delegada do servizo de inspección dos tributos municipais durante o exercicio 2020 e seguintes, conforme ás seguintes bases reguladoras:

Primeira.- Obxecto:

Constitúe o obxecto destas bases a regulación dun plan de cooperación entre a Deputación Provincial de Ourense e os concellos da provincia para a prestación pola Deputación Provincial, en réxime de competencia delegada, do servizo de inspección dos tributos municipais.

Segunda.- Contido da delegación das competencias municipais de inspección tributaria na Deputación. Ámbito funcional, territorial e temporal.

En virtude do presente plan de cooperación, os concellos que se adhiran ao mesmo, delegan na Deputación Provincial o exercicio das competencias de inspección de tributos, nos seguintes termos:

a) Ámbito funcional:

a.1) Os concellos adheridos delegarán na Deputación Provincial o exercicio de todas as funcións que integran a inspección tributaria, conforme coa lexislación vixente, para a totalidade dos tributos municipais, agás aqueles que expresamente se exceptúen polo concello no acordo de adhesión.

Exceptúanse do ámbito da delegación as contribucións especiais e as taxas que se perciban pola prestación de servizos, nos supostos en que o pagamento das ditas taxas se realice con carácter previo á prestación dos servizos que orixina a súa devindicación.

a.2) Os concellos adheridos autorizan á Deputación Provincial a solicitar dos órganos competentes da Administración tributaria do Estado a delegación do exercicio da competencia de inspección do imposto de actividades económicas, ao abeiro do establecido no artigo 91.3 do Texto refundido da Lei reguladora das facendas locais, agás que expresamente indiquen o contrario.

b) Ámbito territorial:

As delegacións conferidas en virtude do presente plan de cooperación referiranse aos tributos devindicados nos termos municipais dos concellos delegantes. Non obstante o anterior, e de conformidade co establecido no artigo 7.4 do Texto refundido da Lei reguladora das facendas locais, a Deputación Provincial poderá exercer tales facultades delegadas en toda a provincia, cinguíndose, en todo caso e exclusivamente, aos tributos delegados dos concellos adheridos.

c) Ámbito temporal:

As delegacións conferidas en virtude do presente plan de cooperación serán eficaces nos termos indicados na cláusula terceira, apartado segundo, das presentes bases.

Terceira. Procedemento de adhesión ao plan de cooperación.

1. Para a adhesión ao plan de cooperación, os concellos interesados deberán presentar no Rexistro xeral electrónico da Deputación provincial ou en calquera dos lugares previstos no artigo 16.4 da Lei 39/2015, do 1 de outubro, do procedemento administrativo común das administracións públicas, o correspondente certificado do acordo de adhesión, conforme co modelo recollido no anexo I, mediante acordo adoptado polo Pleno municipal co quórum

esixido no artigo 47.2.h) da Lei 7/1985, do 2 de abril, reguladora das bases do réxime local. No acordo de adhesión, os concellos especificarán, se é o caso, os tributos cuxa inspección se exceptúa expresamente da delegación (entendéndose, no caso contrario, que se delega para todos os tributos a que se refire o presente plan). Igualmente, e de se – lo caos, poderán indicar se se opoñen a que a Deputación solicite da Administración tributaria do Estado a delegación da competencia de inspección do IAE.

2. Os acordos de adhesión ao presente plan de cooperación terán eficacia no prazo de dez (10) días hábiles contados a partir da súa entrada no Rexistro Xeral da Deputación Provincial. A aceptación da delegación de competencias entenderase automaticamente concedida sempre que os acordos de adhesión se axusten ao establecido no plan.

Nos supostos en que se advirta que o acordo de adhesión non se axuste ás condicións do plan, a Presidencia, dentro do indicado prazo de dez días hábiles, comunicará esta circunstancia aos concellos, co obxecto de que procedan a emendar as deficiencias advertidas. A adhesión ao plan non será eficaz ata que os concellos emenden as deficiencias advertidas.

3. Mediante resolución da Presidencia da Deputación, aprobarase a lista de adhesións ao plan de cooperación, a medida que estas se vaian producindo, ordenando a súa publicación no Boletín Oficial da Provincia, para os efectos previstos no artigo 7.2 do Texto refundido da Lei reguladora das facendas locais.

Cuarta.- Exercicio das competencias delegadas.

1. O exercicio das facultades de inspección tributaria delegadas por parte da Deputación axustarase aos procedementos, trámites e medidas en xeral, xurídicas ou técnicas, relativas á xestión tributaria que establece o Texto refundido da Lei reguladora das facendas locais e, supletoriamente, ás que prevé a Lei xeral tributaria.

2. Os actos de xestión que se realicen no exercicio da delegación serán impugnables consonte co procedemento que corresponda para a revisión dos actos administrativos da Deputación Provincial, e, en último termo, ante a xurisdición contencioso administrativa, conforme coa normativa vixente.

3. As facultades delegadas serán exercidas polo órgano da Deputación Provincial que proceda conforme coas normas de distribución de atribucións propias da Deputación.

4. A inspección delegada dos tributos municipais levarase a cabo por xestión directa, encomendándose ao Servizo de Xestión Tributaria e Recadación, dependente da Área de Tesourería da Deputación Provincial. Para tal efecto, a relación de postos de traballo da

Deputación precisará as unidades administrativas e postos de traballo que asumirán a realización de función inspectoras, particularmente aquelas que impliquen exercicio de autoridade.

5. Non obstante o anterior, a Deputación Provincial poderá concertar con empresas especializadas, mediante contratos de servizos, a realización de traballos materiais de colaboración para o desenvolvemento das funcións inspectoras.

Quinta.- Réxime económico da delegación.

1. En contraprestación pola prestación delegada do servizo de inspección, a Deputación Provincial percibirá a taxa establecida na Ordenanza fiscal reguladora da taxa pola prestación dos servizos de xestión, inspección e recadación da Deputación Provincial de Ourense (BOP n.º 210, do 12 de setembro de 2014).

2. A Deputación Provincial resérvase en todo caso a potestade de modificar a dita ordenanza, sen prexuízo da facultade recoñecida aos concellos para proceder á súa baixa do plan.

Sexta.- Control do exercicio da delegación por parte dos concellos.

Os concellos delegantes poderán realizar un control e seguimento do exercicio da delegación conferida mediante a solicitude de información detallada, en calquera momento, das actuacións inspectoras realizadas.

Os concellos poderán ademais formular as suxestións, queixas ou reclamacións que estimen oportunas, que deberán ser contestadas por escrito pola Deputación Provincial no prazo máximo de un (1) mes.

Sétima. Vixencia do plan.

O presente plan terá vixencia indefinida, entrado en vigor na data da publicación da súa aprobación definitiva no BOP, sen prexuízo da posibilidade da súa modificación ou substitución por acordo do pleno da Deputación, e da posibilidade da baixa voluntaria dos concellos nos termos previstos na cláusula seguinte.

Oitava. Baixa voluntaria do plan dos concellos adheridos.

Os concellos adheridos ao plan poderán darse de baixa voluntaria deste en calquera momento, mediante acordo adoptado polo Pleno do concello co quórum esixido no artigo 47.2.h) da Lei de bases do réxime local e comunicado á Deputación a través do seu Rexistro Electrónico.

O acordo de baixa terá efectividade no prazo de seis meses dende a data de presentación no Rexistro Electrónico da Deputación.

Novena. Normativa aplicable.

O presente plan ten natureza administrativa, correspondéndolle á xurisdición contencioso-administrativa a resolución das controversias sobre a súa validez, eficacia, efectos e extinción.

Anexo I: *Modelo da parte dispositiva do acordo de adhesión ao plan de cooperación entre a Deputación Provincial de Ourense e os concellos da provincia para a prestación pola Deputación Provincial, en réxime de competencia delegada, do servizo de inspección dos tributos municipais.*

1º) Aprobar a adhesión do concello de ao plan de cooperación entre a Deputación Provincial de Ourense e os concellos da provincia para a prestación pola Deputación Provincial, en réxime de competencia delegada, do servizo de inspección dos tributos municipais.

2º) Delegar na Deputación Provincial de Ourense o exercicio das competencias municipais de inspección de tributos, nos termos previstos no dito plan.

Exceptúanse da dita delegación os seguintes tributos : (indíquense os que procedan)

3º) Autorizar á Deputación Provincial de Ourense a solicitar dos órganos competentes da Administración do Estado a delegación do exercicio das competencias de inspección do imposto de actividades económicas, durante o período de vixencia do plan (no caso de que o concello se opoña a esta delegación, deberá indicarse expresamente).

2º) Someter o plan inicialmente aprobado a información pública polo prazo de dez (10) días hábiles, mediante a publicación do correspondente anuncio na sede electrónica e no Boletín Oficial da provincia de Ourense. De non producirse alegacións entenderase aprobado definitivamente e, no caso contrario, someteranse aquelas á consideración do pleno para a aprobación definitiva do plan. Logo de aprobarse definitivamente o plan, publicarase o oportuno anuncio no Boletín Oficial da Provincia de Ourense e na sede electrónica, incluíndo o texto íntegro da súas bases reguladoras.

3º.- MOCIÓN DO GRUPO SOCIALISTA SOBRE O ENLACE ENTRE A AUTOVÍA A-52 E OS POLÍGONOS INDUSTRIAIS DA ÁREA URBANA DE OURENSE.-

D. Álvaro Vila Araújo, do Grupo Socialista, expón o contido da proposta.

D.ª Montserrat Lama Nóvoa, portavoz de Ciudadanos-Partido de la Ciudadanía, di que reserva o seu voto para o Pleno porque está recompilando información sobre o asunto.

D. Bernardo Varela López, portavoz do BNG, cre que efectivamente esta actuación da Xunta queda coxa e non cumpre a súa finalidade para o que sería necesario concluír o proxecto na súa totalidade.

Non se producen máis intervencións e co voto favorable do Grupo Socialista (3) e do BNG (1) e a abstención do Grupo Popular (5), de Democracia Ourensana (1) e de Ciudadanos-Partido de la Ciudadanía (1), a comisión ditamina favorablemente a adopción, por parte do Pleno, do seguinte acordo:

1º.- Instar á Xunta de Galicia á execución completa, integral e de todos os tramos da ronda este A52-A75, incluída no seu plan sectorial da rede viaria de Ourense, e denominada pola consellería “vía de conexión da A-52 co Polígono de San Cibrao”.

2º.- Instar á Xunta de Galicia á execución desta infraestrutura con características de autovía ou vía de alta capacidade, tal e como determinaron os estudos.

3º.- Dar traslado deste acordo ao Consello de Goberno da Xunta de Galicia.

4º.- MOCIÓN DE URXENCIA.- Trala declaración previa da súa urxencia, tratouse o seguinte asunto:

4ºA.- MODIFICACIÓN DAS BASES PARA A ELABORACIÓN E EXECUCIÓN DO PLAN PROVINCIAL 2020 (BOP N.º 254, DO 5 DE NOVIEMBRE DE 2019).

O Sr. secretario expón o contido da proposta.

Non se producen intervencións e por unanimidade, a comisión ditamina favorablemente a adopción, por parte do Pleno, do seguinte acordo:

1º.- Modificar a base 3ª, apartado 2º, das bases para elaboración e execución do Plan provincial de cooperación ás obras e servizos municipais e da rede viaria provincial para o exercicio 2020, que terá o seguinte contido:

2.- Prazo de presentación de solicitudes: As solicitudes deberán dirixírselle ao presidente da Deputación e deberán ter entrada no rexistro electrónico xeral da Deputación ou en calquera dos lugares previstos no artigo 16.4 da Lei 39/2015, do 1 de outubro, de

procedemento administrativo común das administracións públicas, antes de que remate o día 10 de xaneiro de 2020. Este prazo terá carácter improrrogable . A falta de formulación da solicitude en prazo dará lugar á perda do dereito á participación no Plan provincial.

2º.- Publicar este acordo no BOP, para xeral coñecemento.

5º.- ROGOS E PREGUNTAS.- Nesta quenda prodúcense as seguintes intervencións:

D. Aurentino Alonso Araújo, do Grupo Socialista, di que recentemente se prestou asistencia para poda de árbores e traballos de xardinería ao Concello da Rúa e pregunta se o servizo está dispoñible para todos os concellos e como hai que solicitalo.

O **presidente da comisión** informa que a Deputación Provincial pon a disposición de todos concellos que o soliciten tanto a maquinaria do parque de maquinaria como a brigada de zonas verdes, sendo por parte dos concellos o custo de materiais e combustible.

E, ás 18.25 horas, dáse por finalizada a reunión, redactándose a presente acta que se asinará electronicamente. Dou fe.